

521359

福建通志

第陸冊
通紀

R295.7

1

福建通紀卷十九

清九

德宗光緒元年正月諭臺灣後山亟須耕墾所有從前不准內地民人渡臺各例禁著悉與開除其販買鐵竹兩項並著一律弛禁以廣招來

東華錄

諭遼祿禎奏履勘琅璫形勢擬建城設官卽著照所議上
管帶福靖左營遊擊王開俊入勦臺灣內山獅頭社番遇伏陣亡守備周占魁楊舉秀千總楊占魁及勇丁九十三名隨同戰歿請旨交部從優議卹前哨遊擊李玉貴左哨千總李長興未能策應均按軍法分別懲辦

二月十三日沈葆楨抵安平檄飭各營悉聽提督唐定奎調度定奎議以生番恃密菁深林爲藏身之固我進彼隱我退彼見與中原之勦髮捻迥不同欲殲豺狼必剪荆棘因定進勦之路一出南勢湖一出刺桐脚招土勇千餘人爲鄉導督飭各軍將山腰荳菜概行剪薙自南勢湖至刺桐脚止開路寬三十餘丈直三千餘丈刺桐脚迤北兇番日出要劫或百餘人

或數百人均經格鬪槍斃數名始退銘中副軍中前軍亦陣亡數名

三月三日又開路三里有奇至竹坑山下地勢迴旋爲竹坑獅頭往來必由之道八日仍督將上前行伐木繞至竹坑山之後其地曰竹坑埔距刺桐脚十里溪廣山高竹坑社在其東南阿栽米息中心崙在其正東內外獅頭社皆在溪北令左軍左營管帶陳有元築壘扼之南勢湖一路亦開通三里有奇派管帶銘字中軍左營梁善明駐之自入山步步爲營非唯輒石無所取資卽版築亦難咄嗟立辦因購麻袋數萬挈之以趨遇敵則攻得險卽守就地囊土立壁不日而成竹坑布置就緒循大龜紋溪向內外獅頭等社開路社番登高瞭望百十成羣二十五日正在伐木突有兇番二百餘人蜂擁截路張光亮章高元麾隊迎戰鏖鬪逾時陣斬十餘名槍傷十數名而散乘勝入砦焚其草寮五六十區詢諸土人蓋龜紋所屬之本武社也南勢湖經提督王德成等沿途開通每日兇番四五百人截路互有殺傷焚其沿山草寮百餘所社番堅築石臺爲久踞計

四月一日定奎登絕頂見內獅頭社正面懸崖如削無徑可通仍飭各營循龜紋溪而進至三日又廓清三里有餘張光亮正覓路上山相度營址忽兇番二三百人突起莽中短兵奮擊副將馬加銀遊擊張賢扶均受傷勇丁亦受傷六名南勢湖派副將劉朝林營於獅頭山背去外獅頭社僅二里訪聞大甘仔力周式濫等社萃居外獅頭社壘石牆插鹿角建望臺樹哨旗以守兵勇陣亡受傷者亦數十名十五日定奎回授各統帶機宜十六日自督親兵正營及左營右營進勦內獅頭社自卯至巳破其砦抄出福靖左營旗幟十餘面擡礮番桿刀斧火藥鴟芋等件焚其草寮二百間提督周志本暨副將劉朝林等勦外獅頭社自卯至辰連破五卡巳時攻克外獅頭社抄出刀斧火藥鴟芋與內獅頭社相埒焚其草寮一百餘間隨於前後溪壑覓得白骸甚夥千總郭占鰲指爲王開俊及勇丁等捐軀之地以木匣殮之二十日營務處田勤生帶隊巡山派縣丞李際泰同勇丁至內獅頭社見密箐中有首級絡於竿杪急爲解懸負回營次經定

奎飭郭占鰲及其舊部兵勇等環視咸稱確係前遊擊王開俊之首卽備木匣裝送郡城交故員家屬收葬五月九日番目等率散番五十餘人到營乞降定奎傳譯曉諭利害均給衣履諸物各跪戴而歸十二日枋山民人程古六又帶內外龜紋等社番目及散番百餘人到營乞降定奎示約七條曰遵薙髮曰編戶口曰交兇犯曰禁仇殺曰立總目曰墾番地曰設番塾以龜紋社首野艾向爲諸社頭人拔充總社目統之所統番社如有殺人卽著總目交兇如三年之內各社並無擅殺一人卽將總目從優給賞其獅頭社餘孽探悉竄伏何社卽由何社跟交不許藏匿野艾及各番均願遵約竹坑社更名曰永平社本武社更名曰永福社草山社更名曰永安社內外獅頭社更名曰內外永化社脅從各社均許自新惟獅頭罪大惡極漏網者不許復業以昭炯戒所有內外永化社卽著總社目另招屯墾於枋寮地方先建番塾一區令各社均送番童三數人學語言文字以達其性習拜跪禮讓以柔其氣各番無不帖服

以上沈文肅奏議

沈葆楨奏修築臺郡城垣工程完竣

東華錄

五月十一日福建巡撫王凱泰由省東渡十七日抵臺公同參酌奏請臺

北擬建一府三縣查艋舺當雞籠龜崙兩大山之間沃壤平原兩溪環抱

村落衢市蔚成大觀西至海口三十里直達八里坌滬尾兩口並有觀音

山大屯山以爲屏障且與省城五虎門遙對非特淡蘭扼要之區實全臺

北門之管前淡水同知半年駐竹塹衙門半年駐艋舺公所相去百二十

各數十里命盜等案層見叠出往往方急北轅旋憂南顧擬創建府治名之曰臺北府自彰化以北直

達後山胥歸控制仍隸於臺灣兵備道其附府一縣南劃中樞以上至頭

重溪爲界計五十里而遙北劃遠望坑爲界計一百二十五里而近東西

相距五六十里不等方圍折算百里有餘擬名之曰淡水縣自頭重溪以

南至彰化界之大甲溪止南北相距百五十里其間之竹塹卽淡水廳舊

治擬裁淡水同知改設一縣名之曰新竹縣自遠望坑迤北而東仍噶瑪

蘭廳舊治疆域擬設一縣名之曰宜蘭縣雞籠一區以建縣治則其地不

足而通商以後竟成都會且煤務方興末技之民四集海防既重訟事尤繁該處向未設官亦非佐雜微員所能鎮壓若事事受成於艍舠則又官與民交困應請改噶瑪蘭通判爲台北府分防通判移駐雞籠向設南北兩路理番同知南路駐府城北路駐鹿港今內山開闢日廣番民交涉事件日繁舊治殊苦鞭長莫及請將南路同知移紮卑南北路同知改爲中路移紮水沙連各加撫民字樣凡有民番詞訟俱歸審訊將來升科等事亦由其經理又請改臺地營制統歸巡撫節制以一事權仿淮楚軍營歸併以五百人爲一營將南淡嘉義三營調至府城合府城三營安平三營爲一支專顧臺鳳嘉三縣其北路協副將所轄中右兩營合鹿港一營爲一支專顧彰化一帶艍舠滬尾噶瑪蘭三營爲一支專顧淡蘭一帶千總以下卽由巡撫考拔守備以上仍會同總督提督揀選題補臺灣鎮總兵撤去掛印字樣並歸巡撫節制以鎮標中營遊擊隨總兵移駐安平臺協水師中右兩營都司改爲鎮標陸路左右兩營都司原設鎮標左營改爲

撫標左營隨巡撫駐臺其撫標兩營仍駐省改左營爲中營以中軍參將領之原設臺協水師左營遊擊改爲臺灣北路左營遊擊歸北路協副將管轄另片奏學政事宜向由巡臺御史兼理乾隆十七年御史裁撤所有歲科兩試改歸巡道考校其達部事件呈福建學政轉咨今巡撫來臺所有臺屬考試請以巡撫兼理皆得旨准行

沈文肅奏議

鼓勵

東華錄

論沈葆楨臺灣南路剿番攻克各社准軍艱苦出力准其擇尤保獎以示

七月淮軍十三營全數凱撤分三次內渡其病困不能登舟者約近二百人留參將程曾郁爲之調護俟病愈派使船載之歸伍提督羅大春患瘧痢奏明賞假兩個月病勢轉增遂請開缺調福甯鎮總兵宋桂芳來臺代爲經理一切沈葆楨升任兩江總督二十二日內渡臺灣事宜均歸福建巡撫節制

沈文肅奏議

十一月以丁日昌爲福建巡撫

二年三月丁日昌奏閩省吏治日偷牧令缺多瘠苦但求以免過爲了事於民生之疾苦漠不關心由是詞訟之積壓日多牢獄之犯人幾滿佐雜則擅受頻聞書差則惟利是視官吏以百姓爲魚肉百姓以官吏爲寇仇臣以爲欲求正本清源之計必先清理詞訟詞訟既清則百姓不致受胥吏訛詐可遂其耕田鑿井之樂臣現擬於署內設立清理詞訟局派選妥員由稅釐局酌給薪水幫臣稽核一面嚴飭各府州縣將所有詞訟分別上控自理作爲管收除在每月報明各守牧令每月能將案件全結者給予獎勵結數至八成以上者記功不及五成者記過如此次第辦理庶幾詞訟不致積壓牢獄犯人亦可逐漸減少矣

召李鶴年入覲以文煜兼署閩浙總督

四月文煜李鶴年丁日昌奏臺郡安平口三鯤身地方建造洋式礮臺本係知府凌定國副將周振邦監督辦理一切工料均歸凌定國經管臣日昌先經訪聞凌定國有侵吞工料銀至巨萬情事卽於二月飭令臺灣道

夏獻綸認真查辦並諄屬其不可含糊徇隱代人受過旋據夏獻綸稟
督同臺灣府周懋琦臺防同知孫壽銘前赴安平查點大小工人數目均
有短少所給工價亦較冊報有減凌定國撥有勇役厨子火夫仍每日提
用小工二十人洋人轎夫已在巡洋項下開銷則又混稱在內凌定國經
手領過銀十二萬九千四百餘兩內有浮開短給之項計應追銀一萬四
千三百七十七兩零尙有甌瓦灰土及各項雜料並無細數呈出其中尙
未知侵吞若干至安平碼頭另歸周振邦管理均未呈出細數經提集管
張謝斌等嚴訊均諉凌定國及其弟定邦經手而傳訊凌定邦又皆諉凌
定國相應請旨將凌定國卽行革職澈訊追究

李鶴年奏遣撤李承光駐閩各軍

五月文煜丁日昌奏特參文武各員請旨分別革職正法奉旨提督銜總
兵朱名登以專閩大員委帶營勇竟敢曠缺不補並於游擊郭珍明等尅
扣勇糧等情始終袒護遊擊郭珍明都司何積祖從九品郭秉義通同尅
騙甚重已清九

扣勇糧朱名登何積祖郭秉義一併革職朱名登郭秉義並著永不敘用
不准投効各路軍營郭珍明何積祖以幫帶哨官輒敢販運洋藥賣與勇
丁吸食希圖漁利敗壞營規實堪痛恨均著軍前正法以昭炯戒

以上東華錄

十六日起省會連日大雨如注至十九日上游山水漲發由水口直衝洪
山橋西門一帶低窪之處不逾時間水已沒頂其餘城中街衢水深三五
尺至八九尺不等巡撫丁日昌親自校巡城上城下大街小巷無不遍及
夜駐紮城上不安寢者旬日遣輪船赴江浙等處運米

王氏一家言

八月文煜丁日昌奏訊明採辦軍械虧蝕銀兩之革員分別定擬並自請
嚴議奉旨候補同知文紹榮沈純均著照斬監候仍照例勒追完繳已革
坐補清軍同知周星詒據供並無侵蝕情事該革員於購辦船隻未能核
實給價致虧洋銀十萬員之多著照所擬勒令繳清發往軍臺効力贖罪
福州將軍兼署閩浙總督文煜以下未能先事覺察一併交部議處此案
並非丁日昌任內之事著毋庸議

九月丁日昌奏臺灣吏治黯無天日故令能以撫字教養爲心者不過百之一二其餘非性耽安逸卽剝削膏脂百姓怨毒已深無可控訴往往鋌而走險釀成大變臺灣所以相傳無十年不反之說也所有貪酷各員如彰化縣朱幹隆嘉義縣楊寶吾等均已先後據實嚴參在案時以候補縣何鑾在彰化格斃著匪林位新立巨功飭其就近接署嘉義縣篆詎何鑾到任後收受書吏稅契陋規不惟不肯酌減且欲多增查嘉義稅契浮收至重新官到任書吏必有點規從前四五千圓近來竟加至一萬餘元而書吏轉攫之於民者又不啻倍蓰以致一官新至勢必稅契四出雞犬不甯楊寶吾前因催收稅契釀成命案甫經查辦而何鑾復敢尤而效之若不認真嚴勅民困何由得甦相應請旨將何鑾先行革職仍飭夏獻綸澈底確查再加嚴辦從之

十月文煜奏福建倚山枕海每遇山水暴發則民田無不被淹是以百姓凡遇衝要之區水勢可灌入者輒築土隄保衛此次閩侯兩縣所有禦患

土隄多被洪水沖決基址無存臣等再四熟商與其暫賑銀錢僅濟目前之急不如代修隄壩可資永遠之防計閩縣應修隄壩僅二處爲費無幾業飭署福州府知府張夢元會同紳士龔其昌盧鏡秋等前往勘估興工侯官縣除官隄不計外民隄之應修築者共有十六處工大費煩向章本係民捐民辦惟被水之後民力拮据亦飭張夢元會同員紳踏勘隄內田畝有力者仍照章資助無力者全行由官給款並可以工代賑臣等仍當嚴督在事官紳認真舉辦

十二月袁保恒奏福建之臺灣地雖僻處海濱而物產豐富加以民番偏處區畫尤難非專駐大臣鎮以重兵舉其地民風吏治營制鄉團事事實力整頓未易爲功若以福建巡撫每年駐臺半載恐閩中全省之政務道里懸隔而轉就拋荒臺灣甫定之規模去任無常而終爲具文甚非計之得也查直隸四川甘肅各省皆以總督辦巡撫事可否移福建巡撫爲臺灣巡撫常川駐守經理全臺其福建全省事宜專歸總督辦理似於臺灣

目前情形不無裨益上諭議奏

三年三月文煜奏閩省內地續添水陸練營以期純熟而資分布下部知之

文煜奏遵設民人待質公所

五月諭福建新設臺北府知府員缺准以江蘇海州直隸州知州林達泉

試署

以上東華錄

是月初旬大雨驟急如瀉適上游建甯山水漲發會於水口奔騰而下初八日衝倒洪山橋墩並衝壞南臺大橋墩二座水勢汹涌較上年更大二尺餘牆圯壁倒幸有備者多傷人較少各當道督率員弁艱辛跋涉粥賑

兼施

王氏一家言

六月閩浙總督何璟奏福建巡撫一缺在各省中最爲清苦近以東渡臺灣諸多繁費查閩省自司道以至各府縣皆有津貼一欸臺灣道府更有加增而撫臣辦公獨未籌及經費誠恐將來公事棘手仰懇俯准於省城

釐金項下每月開支經費銀千餘兩爲巡撫辦公渡臺經費得旨每月開支經費銀一千五百兩戶部知道

諭何璟等所有臺灣府未完同治十年分供粟三萬九千一百七十一石及未完糯米易穀十五石零均按數一體蠲免以紓民力

四年三月諭山西河南被災甚重著由福建等省協濟兩省銀各數萬兩俾資賑需該督撫卽行籌款撥解

四月以吳贊誠署理福建巡撫

六月何璟等奏本年四月間臺灣府城突被風災巡撫行署及北城垛口暨內外民房等處多有坍塌傾折情形並傷斃兵民

五年閏三月賞前福建巡撫丁日昌總督銜專駐南洋會同沈葆楨及各督撫實力籌辦海防南洋沿海水師弁兵統歸節制

四月何璟等奏臺灣北路地方遼濶前經奏請添設府縣嗣於光緒二年又經奏准將淡水同知一缺裁汰噶瑪蘭通判一缺改爲臺北府通判移

駐基隆其噶瑪蘭舊治改爲宜蘭縣卽以原設之通判衙署作爲縣署縣中公事均由臺北府勘轉惟議設之淡水新竹兩縣事屬草創頭緒紛煩未能同時並舉請將淡水新竹二縣暫由臺北府兼攝俟艋舺所屬之地辦有規模再行分別添設以符原議在案復查臺北淡水廳轄自彰化縣北界之大甲溪直抵基隆之貂嶺下之達望坑止計地三百四十五里有奇其中滬尾基隆均屬通商海口華洋雜處事務繁多命盜等案層見迭出前因淡水同知不能兼顧故請區分改設一府三縣旋議將新竹淡水兩縣由府兼攝係出一時權宜察看情形必須分設淡水新竹兩縣方足以資治理刻下艋舺地方考棚民捐民辦業經告成學額已分一府三縣奏請添設明春卽應考試臺北府衙署年內計可完工諸務均已次第興辦設縣尤不可緩其距艋舺十二里新莊地方原有縣丞一員現艋舺旣設府縣新莊縣丞應卽裁撤改爲臺北府經歷兼管司獄事務淡水縣應添設典史一員新竹縣卽將竹塹巡檢改爲新竹縣典史宜蘭縣卽將噶

嗎蘭羅東巡檢改爲宜蘭縣典史又臺灣北路理番同知原駐鹿港旋因內山開闢日廣番民交涉事件日多經奏請將北路同知改爲中路移紮水沙連奉旨允准現在該同知業已移紮鹿港亦爲巨鎮商賈輻輳且須稽查海口距彰化縣城二十里該縣不及兼顧查有彰化縣南報社縣丞堪以移紮鹿港其南報社地方逼近內山亦須佐雜彈壓查臺灣縣巡檢駐紮羅漢門近來該處安靜以羅漢門巡檢移設卽作爲彰化縣南報巡檢衙署仍舊毋須另建似此一爲轉移地方實有裨益下部議奏以勘方錡爲福建巡撫

六月以穆圖善爲福州將軍

七月臺灣防務需人何璟奏調前福建布政使降調道員陳士杰允之

六年正月諭各省設立練營原期一兵得一兵之用豈容將弁隱佔私設致誤操防署福建建甯鎮總兵唐寅清私派練兵前往湖南久未歸伍署內夫役冒佔兵額實屬有干軍政唐寅清著革職永不敘用